

## † R. P. Franciscus Xav. Walsh (1909-1950)

(Vice-Prov. de Manila)

Sabbato 12 Aug. 1950 parva Vice-Provincia de Manila praemature primum suum sodalem amisit, R.P. Franciscum Walsh, in quo Australiano quadragenario admirari licet speciem ac formam, vulgo « ideal », perfecti missionalis Redemptoristae ad exterarum gentes.

1) P. Walsh, relicta semel ex obedientia patria et missus in Insulas Philippinas, ergo in regionem, de qua singulariter verificantur verba Christi: *Messis quidem multa, operarii autem pauci*, sancto ardore se totum huic apostolatu difficili dedit, nec quidquam inde ab initio antiquius habebat quam idioma magnae insulae septentrionali Luzon proprium, nempe *Tagalog*, quam perfectissime addiscere. Actorum diurnorum notitiam non ex ephemeridibus anglis hauriebat, sed ex ephemeride *Tagalog*. Libentius tractabat cum parvulis quam cum adultis linguae anglicae peritis. Tempore occupationis nipponicae inclusus cum aliis in campo concentrationis, et invitatus ad cursum quemdam hispanicae linguae, maluit etiam hoc tempus *suo* idiomati *Tagalog* funditus percipiendo tribuere. Hoc modo assecutus est tantam huius linguae indigenae peritiam, ut docti indoctique aequae libenter eum audirent.

2) Praeterea P. Walsh docet missionarios nostros artem inventis modernis ad fines apostolatus utendi. « Ad quid serviunt (inquiiebat) optimae conciones et instructiones, si non audiuntur a multis? Primum igitur multitudines attrahere debemus ad ecclesiam et facere « propagandam », sicut facere solent viri politici et errorum propagatores ». Itaque P. Walsh, non attendens ad voces vituperantium, etiam confratrum, in suo « jeep » secum portabat ad locum missionis omnia illa instrumenta moderna, quibus e turri ecclesiae omnes loci incolas monere posset, etiam surdastros et refractarios: « *Omnia parata. Venite ad nuptias Filii magni Regis* (cf. Mt. 22, 4). Hac determinata hora incipit sacra missio. Appropere!... ». Hoc novum systema adeo experientia utilissimum repertum est, ut passim nunc adhibeatur, ita volentibus etiam parochis.

3) Tandem P. Walsh nostros missionales et hoc docet: Si adulti venire nolunt, convertite vos ad parvulos. Primo tempore sui apostolatus in oppido S. invenit in adultis horrendam indifferentiam. Tum adiit ludimagistrum et ab eo, licet aegre, obtinuit veniam loquendi ad parvulos in schola ab h. 13 ad 14. Schola finita, eos duxit ad ecclesiam, ut ibi orare et canere discerent. Postea addidit alteram catechesim ab h. 11 ad 12. Hoc modo, in confusionem adultorum tepidorum, saltem complura centena parvulorum bene paravit ad primam confessionem et communionem. Ex eo tempore semper in missionibus sua fecit verba divini Redemptoris: *Sinite*

*parvulos venire ad me et ne prohibueritis eos; talium enim est regnum Dei* (Mc. 10, 14). Pro his idiomate Tagalog scripsit novum catechismum et ubique distribuit.

In quodam vico (*barrio*) prope Baclaran quondam praeparabat iuventutem ad primam communionem. Eius absentia abufitur missionalis americanus acatholicus et pueros puellasque numismatibus, imagunculis, granis zea (*pop-corn*) attrahit ad suum sacellum. Postea adventit P. Walsh. Indignabundus sacellum intrat, statim a parvulis salutatus: « Salve, Pater Walsh! » Ille autem voce forti clamat: « Silentium! In eo est, parvuli, ut tectum huius aedificii concidat; quare subito exeamus! » Exit, et cum eo omnes pueri et puellae, et invanum obstupefactus ministellus clamat: « Protestor, domne, protestor! Tu iuventam subtrahis ab audiendo verbo Dei! Protestor! ».

At nondum facta principalia vitae Patris W. enumeravimus. Natus est in Rutherglen, Victoria, 14 Dec. 1909. Sedicennis a. 1926 venit in nostrum iuvenatum, qui tunc in Galong erat. Post ferias Natalicias a. 1927 admirationem et risum commilitonum excitat Franciscus, revertens cum cane venatico, et cum is mox aufugisset, sibi alterum procurat et eius ope horis liberis fit venator famosus vulpium, in regione Galong adhuc numerosarum. — Sed hic Nemrod erat quoque poetae Shakespeare amantissimus et eius dramata celeberrima cum manipulo scenicorum a se collectorum repraesentare in deliciis habebat. Sed talia delectabilia eum minime retrahebant a studiis seriis, et in fine iuvenatus in historia et lingua anglica obtinuit primum praemium.

Quo tempore studiis altioribus vacabat, studentatus australianus a Pennant Hills ad Ballarat translatus est (a. 1933). Ibi igitur Franciscus W. 8 Mart. 1936 presbyter ordinatus est et a. 1938 in Insulas Philippinas missus, ostendens subsequenter duodecim annis, quam solida fundamenta posuerit praecedentibus annis formationis. In ultimo Catalogo invenitur inter sodales communitatis Melburnensis, quia, liberatus a captivitate iaponensi, per biennium gubernaverat communitatem Baclaran et tunc in patriam ad tempus redierat ad vires exhaustas restabiliendas; verum quam primum potuit, ad dilectam suam Missionem reversus est.

Tragica mors evenit hoc modo. Februario 1950 fortes sensit dolores internos, sed post quietem aliquot hebdomadam sacras expeditiones reassumpsit. Iisdem doloribus gravius se manifestantibus, a chirurgo appendix intestinalis reperta est in pessimo statu et resecta; sed vera mali sedes, grave ulcus in iecore, nondum inventa est. Ad tempus quidem iterum solito entusiasmo operabatur, donec exeunte Iulio morbus recrudesceret. Subiit igitur 10 Augusti novam operationem chirurgi, quae tamen mali causam non abstulit. Etiam sanguinis transfusio sine effectu adhibita. Vespere feriae VI, etiamtum sui conscius, a P. Vice-Provinciali pientissime recepit extremam unctionem. Postea delirabat. Brevi ante obitum evomit ingentem sanguinis atri copiam. Sabbato h. 3.10 inter preces confratrum et Sororum placide exspiravit.

Propter naturam morbi iam h. 10 eiusdem diei Missa exsequialis cantabatur. In theca sepulcrali iacebat corona florum agrestium a parvulis vici Baclaran ibi deposita. Quam significativum est hoc donum! Cadaver postea sepeliebatur in vicino caemeterio vici Pasay. Ibi igitur gloriosam resurrectionem expectat hic dignus signifer Vice-Provinciae de Manila. Requiem aeternam dona ei, Domine!

---